



Jessie 手記

恪守「Work Hard! Play Hard!」原則，城中活動表演、名人飯局、展覽開幕，逢請必到，逢到必早！

新馬季沙田開鑼

130頭醒獅同賀周年

新馬季沙田馬場正式開鑼，Jessie 知道大日子肯定有好節目，所以例必入去捧場。適逢今年係馬會 130 周年，當日大會安排咗 130 頭醒獅助興，係歷年最多，場面墟口兼熱鬧，醒獅在場內砌出馬會名稱「HKJC」及「130」字樣外，並展示馬會 130 周年口號「同心同步同進 共創更好未來」，場內氣氛熱鬧。政務司司長林鄭月娥接過新任馬會主席葉錫安手上嘅大槌，一槌打響巨型銅鑼，象徵新一馬季正式展開。Jessie 知道開鑼日嘅賽事為政府庫房貢獻了港幣 1.36 億元嘅博彩稅，呢個數字創下馬季開鑼日嘅另一項新紀錄。

香港有過百年歷史老字號的機構唔多，屈指可數，馬會係寥寥名牌嘅其中之一，確屬難能可貴。



適逢今年馬會 130 周年，馬會安排 130 頭醒獅盛勢到賀，係歷年最多。



馬會行政總裁應家柏（前排右二）頒獎予獲得「香港賽馬會社區盃」冠軍的南華。

馬會冠名贊助「社區盃」南華 Vs 傑志

暑假最後一日，旺角大球場下午人聲鼎沸，原來馬會冠名贊助嘅「香港賽馬會社區盃」當日舉行，吸引咗四千多名球迷入場觀戰，咁刺激嘅賽事，Jessie 當然要捧場。結果南華擊敗傑志勇奪首屆社區盃，冠、亞軍仲分別獲得港幣 25 萬及 10 萬元獎金。

馬會一向積極支持本地足球運動，今次撥款港幣 100 萬元贊助社區盃，為全新嘅香港超級聯賽揭開序幕，部分贊助及門票收入仲捐咗俾南華同傑志所挑選嘅慈善團體，分別係基督教聯合醫院及香港社區組織協會，令更多人受惠。Jessie 仲留意到當日場內有好多球場稀客，原來馬會贊助咗三百名來自低收入或者少數族裔人士睇波，佢哋手舞足蹈為球隊打氣，睇得好開心！

中大獲馬會贈 13 億元大支票 鄭海泉點數簽收

適逢馬會今年 130 周年，馬會早前宣佈撥出港幣 13 億元協助中大興建全港第三間教學醫院，在捐款典禮上中大、馬會更互送大禮，大家都不知幾高興。

原來呢筆巨額捐款係馬會醫療範疇最大筆捐助，亦係中大建校以來收到最大筆金額捐款。就連縱橫銀行界幾十年嘅中大校董會主席鄭海泉都話未收過咁大面額支票，佢仲好鬼馬咁數吓有幾個零，而會計師出身嘅時任馬會主席施文信等但數完後作狀示意佢簽收，大家都好「均真」。



時任馬會主席施文信（右四）獲中大校長沈祖堯教授（左二）送贈肖像畫。

至於中大送俾施文信嘅肖像畫亦好有心思，畫中嘅施文信著咗唐裝，仲由中大校長「祖堯 BB」提上「造福桑梓」四個大字，桑梓係家鄉嘅意思，寓意施文信多年來造福香港這個家鄉。雖然施文信係蘇格蘭人，但廿幾歲已經隻身來香港成家立業，轉眼已經 40 幾年，香港已經係佢第二個家。

講番中大教學醫院項目，呢間教學醫院主要針對夾心階層的醫療需要，將以套餐形式收費，預計 2018 年落成，到時睇病要俾幾多錢就可以有個預算。另外，中大仲會成立「賽馬會老年學研究所」，希望可以減低人口老化為本港帶嚟嘅挑戰。

周永健高舉火龍頭賀中秋

中秋佳節，除咗一家人賞月食月餅外，馬會董事周永健呢位大坑舊街坊，就選擇重遊舊地，參加大坑舞火龍盛會。2011 年被列入為國家級非物質文化遺產嘅大坑舞火龍，係本地中秋盛事，仲連續五年獲馬會贊助。唔經唔覺，大坑火龍盛會今年已經係第 135 屆，每年都動員 300 幾名老中青街坊，一齊舞動全長 200 幾呎嘅火龍，為區內居民祈福保平安。

周生同 Jessie 講，佢 30 幾年前住係大坑，但今年都係第一次參與呢個傳統文化節慶，仲要係高舉 70 幾斤重嘅龍頭，少啲力氣都唔得；而另一位馬會董事利子厚亦有到場湊熱鬧，佢話睇舞火龍令人一世難忘，年年都會嚟睇。



馬會董事周永健高舉 70 多斤重嘅火龍龍頭。



馬會董事利子厚為大坑火龍舞龍角青。